

**Undang-undang Tentera Sehingga Keamanan da Ketenteraman Pulih - Panglima
Tentera Thailand
Bernama
Mei 20, 2014**

BANGKOK, 20 Mei (Bernama) -- Panglima Tentera Thailand Jen Prayuth Chan- Ocha berkata undang-undang tentera yang diisytiharkan di negara itu awal pagi ini akan ditarik balik apabila keamanan dan ketenteraman kembali pulih di negara itu.

Beliau menyeru semua pihak yang terlibat supaya mencari penyelesaian terhadap konflik itu dengan segera.

Jen Prayuth berkata beliau tidak tahu berapa lama undang-undang tentera akan dikuatkuasakan di negara itu.

"Kami tidak akan membenarkan pertumpahan darah berlaku di negara ini," kata beliau dalam sidang media selepas menemui pegawai kanan kerajaan, wakil perusahaan negara, pertubuhan profesional dan sosial dari seluruh negara, di sini hari ini.

Ketika ditanya sama ada ia akan menyebabkan rampasan kuasa, beliau berkata: "Ia adalah soalan yang tiada siapa akan menjawab. Saya tidak akan menjawab apa-apa. Jangan membuat andaian sendiri."

Ketika undang-undang tentera diisytiharkan di seluruh negara, kerajaan awam sementara masih terus berfungsi tetapi operasi pengaman dikenali sebagai Markas Pemeliharaan Keamanan dan Ketenteraman telah ditubuhkan dengan Jen Prayuth sendiri sebagai pengarah.

Beliau enggan memberitahu jika ada rancangan untuk mengenakan perintah berkurung tetapi sebaliknya secara bergurau menjawab "kenakan perintah berkurung ke atas wartawan dahulu" apabila pemberita memintanya memberi jawapan.

Sementara itu, anggota Suruhanjaya Pilihan Raya (SPR) Somchai Srisutthiyakorn berkata kerajaan sementara telah menghantar surat kepada SPR dengan mencadangkan 3 Ogos sebagai tarikh baharu bagi pilihan raya umum.

Cadangan sebelumnya adalah 20 Julai.

Beliau berkata kerajaan sementara juga bersetuju supaya draf perintah diraja berhubung pilihan raya mengandungi peruntukan yang menyebut bahawa pilihan raya boleh ditunda jika berlaku darurat.

Kerajaan juga menegaskan bahawa pemangku Perdana Menteri Niwatthamrong Boonsongpaisan mempunyai kuasa untuk mengemukakan draf itu untuk mendapat perkenan diraja, kata beliau.

Somchai berkata kerajaan mahu SPR memberi jawapan menjelang 23 Mei dan mengumumkan

bahawa suruhanjaya itu akan mengadakan mesyuarat berhubung perkara itu esok.

Niwatthamrong juga mengulas tentang undang-undang tentera yang diisytiharkan oleh tentera untuk memelihara ketenteraman dan mengembalikan keamanan di negara itu.

Beliau berkata kerajaan juga menaruh harapan yang sama bagi keamanan negara dan berharap undang-undang tentera dikuatkuasakan secara aman tanpa keganasan dan diskriminasi dan mengikut undang-undang selaras dengan dasar kerajaan sekarang.

"Tindakan Tentera Diraja Thailand mestilah berdasarkan prinsip Perlembagaan dan Demokrasi dengan Raja sebagai ketua negara," kata beliau.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1039843>